



禹州志卷十七

列傳總序

作志之體與著史同彰善癉惡非特述懿行也凡官於斯州及州之奇人傑士列女與夫遺行之足以垂戒者例得具書今分爲十六門總題曰列傳爲八卷以良吏宦績弁其首次名臣次治行次耆碩次忠義次孝友次儒行次文苑次義行次隱逸次方技次二氏次寓賢至其人不足法而其事不容沒者則援宋歐陽脩新五代史之例歸諸雜傳而終之以列女焉詩曰高山仰止景行行止又曰維桑與梓必恭敬止論語曰見賢思齊焉見不賢而內自省也嗚呼後之人其敬誦

禹州志

卷之十七

列傳一

一

之哉述列傳

列傳一

良吏傳

漢潁川太守趙廣漢字子都涿郡蠡吾人少爲郡吏州從事舉茂才爲陽翟令治行尤異遷京輔都尉以宣帝定策功賜爵關內侯遷潁川太守郡大姓原褚宗族橫恣賓客犯爲盜賊前二千石莫能擒制廣漢旣至數月擒原褚首惡郡中震栗先是潁川豪傑大姓相與爲婚姻吏俗朋黨廣漢患之厲使其中可用者受計出有案問旣得罪名行法罰之廣漢故漏泄其語令相怨咎又敎吏爲鉅箒及得投書削其主名而託以爲豪傑大姓

子弟所言其後彊宗大族家家結爲仇讐姦黨散落風俗大改
吏民相告訐廣漢得以爲耳目盜賊以故不發發又輒得壹切
治理威名流聞及匈奴降者言匈奴中皆聞廣漢廣漢爲人彊
力天性精於吏職尤善爲鈎距以得事情它人莫能及也郡中
賊盜閭里輕俠其根株窟穴所在及吏受取請求銖兩之姦皆
知之所居好用世吏子孫新進年少者專屬彊壯蠱氣見事風
生無所回避率多果敢之計莫爲持難後以論丞相魏相妻殺
婢事不實論死

漢書本傳

論曰舊志不載廣漢鉅筭事意謂權術制馭不足範後然志
載名宦非史家傳循吏比苟有名則書之語從其實猶勝於
後之以虛詞誣飾也廣漢以廉潔通敏下士爲名其行事與
張湯近湯酷而廉廣漢譎而明史稱其威制豪強小民得職
百姓追思歌之至今固亦不妄得名哉

潁川太守韓延壽字長公燕人也徙杜陵少爲郡文學以父義
諫燕王死擢諫大夫遷淮陽太守徙潁川潁川多豪強難治國
家常爲選良二千石先是趙廣漢患其俗多朋黨故構會吏民
令相告訐一切以爲聰明潁川由是以爲俗民多怨讐延壽更
之教以禮讓恐百姓不從乃歷召郡中長老爲鄉里所信向者
數十人設酒具食親與相對接以禮意人人問以謠俗民所疾
苦爲陳和睦親愛銷除怨咎之路長老皆以爲便可施行因與

議定嫁娶喪祭儀品畧依古禮不得過法延壽於是令文學校官諸生皮弁執俎豆爲吏民行喪嫁娶禮百姓遵用其教賣偶車馬下里僞物者棄之市道數年徙東郡太守遷左馮翊後以與御史大夫蕭望之爭事爲望之所持宣帝惡延壽遂論死吏民寃之延壽爲吏上禮義好古教化所至必聘其賢士以禮待用廣謀議納諫爭舉行喪讓財表孝弟有行修治學宮春秋鄉射陳鐘鼓管弦盛升降揖讓及都試講武設斧鉞旌旗習射御之事治城郭收賦租先明布告其日以期會爲大事吏民敬畏趨鄉之又置正五長相率以孝弟不得舍姦人間里仵伯有非常吏輒聞知姦人莫敢入界其始若煩後吏無追捕之苦民無箠

禹州志

卷之十七

列傳一

三

楚之憂皆便安之其後黃霸代延壽居潁川因其迹而大治

漢書本傳

論曰班史言廣漢聰明下不能欺延壽厲善所居移風然皆訐上不信以失身墮功按延壽治績過廣漢遠甚廣漢犯魏禍由已作延壽則爲望之所陷史乃比類譏之過矣然亦惜其不能小忍以陷大僂也 國朝朱氏軾蔡氏世遠編歷代循吏美延壽之考行古禮與民爲讓彬彬乎三代之遺風而重嘆其不幸豈不然歟至延壽之置正伍長則又後世保甲法所自仿云

潁川太守黃霸字次公淮陽陽夏人也以豪傑役使徙雲陵少學律令喜爲吏自武帝末用法深昭帝立幼大將軍霍光秉政

大臣爭權遂遵武帝法度以刑罰痛繩羣下繇是俗吏尙嚴酷以爲能霸獨以寬和名宣帝卽位以夏侯勝薦擢爲揚州刺史三歲下詔曰制詔御史其以賢良高第揚州刺史霸爲潁川太守秩比二千石居官賜車蓋特高一丈別駕主簿車綈油屏泥於軾前以章有德時上垂意於治數下恩澤詔書吏不奉宣太守霸爲選擇良吏分部宣布詔令令民咸知上意使郵亭鄉官皆畜雞豚以贍鰥寡貧窮者然後爲條教置父老師帥伍長班行之於民間勸以爲善防姦之意及務耕桑節用植財種樹畜養去食穀馬米鹽靡密初若煩碎然霸精力能推行之吏民見者語次尋繹問他陰伏以相參考嘗欲有所伺察擇長年廉吏

禹州志

卷之十七

列傳一

四

遣行屬令周密吏出不敢舍郵亭食於道旁烏攫其肉民有欲詣府口言事者適見之霸與語道此後日吏還謁霸霸見迎勞之曰甚苦食於道旁乃爲烏所盜肉吏大驚以霸具知其起居所問毫釐不敢有所隱鰥寡孤獨有死無以葬者鄉部書言霸具爲區處某所大木可以爲棺某亭猪子可以祭吏往皆如其識事聰明如此吏民不知所出咸稱神明姦人去入他郡盜賊日少霸力行教化而後誅罰務在成就安全長吏許丞病聾督郵白欲逐之霸曰許丞廉吏雖老尙能拜起送迎止頗重聽何傷且善助之母失賢者意或問其故霸曰數易長吏送故迎新之費及姦吏緣絕簿書盜財物公私費耗皆出於民所易新

吏又未必賢或不如其故徒相益爲亂凡治道去其太甚者耳
霸以外寬內明得吏民心戶口歲增治爲天下第一徵守京兆
尹秩二千石坐發民治馳道不先以聞又發騎士詣北軍馬不
適士刻乏軍興連貶秩有詔歸潁川太守官以八百石居治如
其前前後八年郡中愈治是時鳳凰神爵數集郡國潁川尤多
天子以霸治行終長者下詔稱揚曰潁川太守霸宣布詔令百
姓鄉化孝子弟弟貞婦順孫日以衆多田者讓畔道不拾遺養
視鰥寡贍助貧窮獄或八年無重罪囚吏民鄉於教化興於行
誼可謂賢人君子矣書不云乎股肱良哉其賜爵關內候黃金
百斤秩中二千石而潁川孝弟有行義民三老力田皆以差賜

禹州志

卷之十七

列傳一

五

爵及帛後數月徵爲太子太傅遷御史大夫五鳳三年代丙吉
爲丞相封建成侯自漢興言治民吏以霸爲首甘露三年薨諡

曰定

漢書本傳

論曰班氏謂霸材長於治民及爲丞相總綱紀號令風采不
及丙魏於定國功名損於治郡時後之論者或謂霸不自立
傳而以入循吏於義未安然班述馬史例法嚴謹非若後世
蕪雜以循吏目霸不爲過也至霸以欲奏神雀爲張敞所譏
猶載王成之僞增戶口美惡互見良史之體裁務在可否相
濟以爲後法抑宣帝任霸亦第責以郡守之事其信用遠不
逮丙魏烏能專責霸哉

潁川太守何竝字子廉祖父以吏二千石自平輿徙平陵竝爲郡吏至大司空掾事何武武高其志節舉能治劇爲長陵令道不拾遺哀帝時自隴西太守徙潁川代嚴詡是時潁川鍾元爲尚書令領廷尉用事有權弟威爲郡掾贓千金竝爲太守過辭元元免冠爲弟請一等之罪願早就髡鉗竝曰罪在弟身與君律不在於太守元懼馳遣人呼弟陽翟輕俠趙季李欵多畜賓客以氣力漁食閭里至姦人婦女持吏長短聞竝且至皆亡去竝下車求勇猛曉文法吏且十人使文吏治三人獄武吏往捕之各有所部敕曰三人非負太守乃負王法不得不治鍾威所犯多在赦前驅使人函谷關勿令汙民間不入關迺收之趙李

禹州志

卷之十七

列傳一

六

桀惡雖遠去當得其頭以謝百姓鍾威負其兄止雒陽吏格殺之亦得趙李它郡持頭還竝皆懸頭及其具獄於市郡中清靜表善好士見紀潁川名次黃霸性清廉妻子不至官舍數年卒疾病召丞掾作先令書曰告子恢吾生素餐日久死雖當得法賻勿受葬爲小椁亶容下棺恢如父言王莽擢恢爲關都尉建武中以竝孫爲郎史臣班固謂竝之節亞尹翁歸云

漢書本傳

潁川太守寇恂字子翼上谷昌平人從光武兵間爲偏將軍建武二年坐繫考上書者免是時陽翟嚴終趙敦聚衆萬餘與密人賈期連兵爲寇恂免數月復拜潁川太守與破姦將軍侯進俱繫之數月斬期首郡中悉平定封恂雍奴侯邑萬戶時執金

吾賈復在汝南部將殺人於潁川恂捕得繫獄時尚草創軍營犯法率多相容恂乃戮於市復以爲恥還過潁川謂左右曰吾與寇恂並列將帥而今爲其所陷大丈夫豈有懷侵怨而不決之者乎今見恂必手劔之恂知其謀不欲與相見谷崇曰崇將也得帶劔侍側卒有變足以相當恂曰不然昔藺相如不畏秦王而屈於廉頗者爲國也區區之趙尙有此義吾安可以忘之乎乃敕屬縣盛供具儲酒醪執金吾軍人界一人皆兼二人之饌恂乃出迎於道稱疾而還復勒兵欲追之而吏士皆醉遂過去恂遣谷崇以狀聞帝乃徵恂恂至引見時復先在坐欲起相避帝曰天下未定兩虎安得私鬪今日朕分之於是並坐極歡

禹州志

卷之十七

列傳一

七

遂共車同出結友而去恂歸潁川三年遣使者卽拜爲汝南太守七年代朱浮爲執金吾明年從車駕擊隗囂而潁川盜賊羣起帝乃引軍還謂恂曰潁川迫近京師當以時定惟念獨卿能平之耳從九卿復出以憂國可知也恂對曰潁川剽輕聞陛下有事隴蜀故狂狡乘間相誑誤耳如聞乘輿南向賊必惶怖歸死臣願執銳前驅卽日車乘南征恂從至潁川盜賊悉降而竟不拜郡百姓遮道曰願從陛下復借寇君一年乃留恂長社鎮撫吏人受納餘降後從駕入關平隗囂將高峻十二年卒諡曰

威
後漢書本傳

論曰光武以經術飾吏治故一時諸將多自謹敕而恂潁川

之治最爲著聞固其才兼文武抑亦經明行脩之效與厥後
功臣參議政事惟高密固始膠東三候而恂以早沒不得預
向使年次鄧賈其功烈豈止如史策所載哉

潁川太守郭伋字細侯扶風茂陵人少有志行哀平間辟大司
空府世祖初潁川盜賊羣起建武九年徵拜太守召見辭謁帝
勞之曰賢能太守去帝城不遠河潤九里冀京師并蒙福也君
雖精於追捕而山道險阨自鬥當一土耳深宜慎之伋到郡招
懷山賊陽夏趙宏襄城召吳等數百人皆束手詣伋降悉遣歸
附農因自刻專命帝美其策不以咎之後宏吳等黨與聞伋威
信遠自江南或從幽冀不期俱降駱驛不絕焉

後漢書本傳

禹州志

卷之十七

列傳一

八

潁川太守任延字長孫南陽宛人年十二顯名太學號爲聖童
避兵隴西隗囂遣使請延延不應光武時歷官守令顯宗卽位
拜潁川太守其後事詳載史傳

後漢書本傳

論曰延名在後漢書循吏傳傳言延在建武時拜武威太守
坐擅誅羌不先上左轉召陵令明帝拜潁川太守永平中復
官河內太守九年而卒其在潁川當不久故無治績著於策
然賢者所至安靜之治民食其福何必赫赫哉舊志列於恂
伋之後宜也

潁川太守秦彭字伯平扶風茂陵人自漢興之後世位相承六
世祖襲爲潁川太守與羣從同時爲二千石者五人故三輔號

曰萬石秦氏建初六年彭復爲潁川太守有鳳凰麒麟嘉禾甘露之瑞集其郡境肅宗巡行再幸潁川輒賞賜錢穀恩寵尤異章和二年卒

後漢書循吏傳

論曰兩漢之治最爲近古二書所載循吏皆克有其實然竊怪祥瑞之出多在近畿地如鳳凰來集一見於黃霸再見於秦彭抑又何也然彭自良吏其治績多與霸稱守山陽尤有異政今獨著其治潁川云

潁川太守宋登字叔陽京兆長安人父由爲太尉登少傳歐陽尚書教授數千人爲汝陰令政爲明能號稱神父遷趙相入爲尚書僕射順帝以登明識禮樂使持節臨太學奏定典律轉拜

禹州志

卷之十七

列傳一

九

侍中數上封事抑退權臣由是出爲潁川太守市無二價道不拾遺病免卒於家

後漢書儒林傳

潁川太守陰脩南陽人以旌賢擢俊爲務舉五官掾張仲方正察功曹鍾繇主簿荀彧主記掾張禮賊曹掾杜祐孝廉荀攸計

吏郭圖爲吏以光國朝

魏志鍾繇傳注引謝承漢書

論曰薦賢爲國最爲人臣之大節舊志但列秩官志而不爲立傳母乃於表章之道有未盡乎

潁川郡功曹劉翊字子相潁川潁陰人家世豐產常能周施而不有其惠常守志卧病不屈聘命河南种拂臨郡引爲功曹翊以拂司徒嵩子嵩居官有聲乃爲起焉拂謂翊擇時而仕甚敬

任之陽翟黃網恃帝乳母程夫人勢求占山澤以自營植拂召翊問曰程氏貴盛在帝左右不聽則恐見怨與之則奪民利爲之奈何翊曰名山大澤不以封蓋爲民也明府聽之則被佞倖之名矣若以此獲禍貴子申甫則自以不孤也拂從翊言遂不與之拂舉翊爲孝廉不就其後舉上計掾入關拜議郎遷陳留太守遭兵亂出關以濟友人困餒遂俱餓死拂字穎伯初爲司隸從事拜宛令政有能名累遷至司空李傕郭汜之亂拂仗劔衛宮力戰而死子劭官侍中服終與馬騰韓遂等起兵共討傕汜爲父報讐軍敗死之翊所謂申甫者也

後漢書獨行傳參种拂傳

論曰翊對种拂之言最爲忠直非獨有功於穎蓋爲千古名

禹州志

卷之十七

列傳一

十

義計而拂亦卒以保其休聲賢者之有益人國如此哉舊志不爲劉翊立傳而附其事於拂拂雖有聽諫之美然以視翊則不侔矣考劉昭百官志云諸郡功曹史主選署功勞太守在陽翟則功曹從郡守可知不可以秩卑而沒其懿故爲之補傳雖然拂良吏也掾之美卽守之美故旣書其名於職官表又爲附見於斯焉

唐陽翟尉皇甫憬未詳何處人開元初監察御史宇文融請檢察僞濫逃戶憬上疏諫之其畧曰太上務德以靜爲本其次化之以安爲生但責其疆界嚴之隄防山水之餘卽爲見地何必聚人阡陌親遣括糧故奪農時臣恐逃逸從此更深元宗方委

任融貶憬爲盈州尉

唐書食貨志

論曰明皇蓄意聚斂所用韋堅楊慎務王鉉楊釗之徒皆務迎上意而融爲之倡其建言在開元八年是時上心猶未盡也後卒以財用侈泰大亂幾亡國憬以小吏上書不避斧鉞之誅可謂難矣憬舊志作景今從新書食貨志所載云

宋陽翟主簿陳靖 道卿莆田人父仁璧仕陳洪進爲泉州別駕洪進歸朝有豪猾負險爲亂靖徒步謁轉運使楊克巽陳討平之策授陽翟主簿契丹侵邊王師數不利靖求入奏機畧詔就問之上五策曰明賞罰撫士衆持重示弱待利而帥府許自辟士而將帥得當制境外太宗善之改將作監丞爲御史盡推

禹州志

卷之十七

列傳一

十一

勸官歷仕至秘書監卒靖平生所建言於勸農事尤詳云

宏簡錄一

統志

陽翟主簿畢仲衍字夷仲雲中人以廕入官縣人張昇方鎮許請於朝欲興學校既具材計工又聽民自以其力輸助邑子馬宏以口舌橫閭里謾謂諸豪曰張公興學而縣命乃因以取諸民由十百而至千萬未已也君將不堪誠捐百金予我能止役豪信之宏卽詣府宣言縣吏盡私爲學之費又將賦於民昇果疑焉令欲上疏辯仲衍曰亡益也不如取宏治之不辯自矣會攝縣事卽逮捕驗治五日得其姦言於昇流宏鄭州一縣

相賀

一統志

鈞州知州劉魁字煥吾江 太和人正德中登鄉薦受業王守仁之門嘉靖初謁選得寶慶府通判歷鈞州知州抵任講道學闢佛老僧尼悉令還俗其政先寬後嚴丈地均糧俱有成法廢毀淫祠建禹湯廟先賢祠八蜡祠及書院社學之屬立社倉歷任七年教化大行兒童走卒咸以父母戴之陞潮州府同知歷工部員外郎民思之奉人遺愛祠後以諫世宗建雷殿於太液池廷杖下獄幾死與御史楊爵給中事周怡同繫數載至二十四年帝感乩仙言釋之既而復逮繫二十六年高元殿災帝露禱火光中若有呼三人 臣者遂傳詔急釋之魁未幾卒隆慶初贈卹如制 明史本傳

禹州志

卷之十七

列傳一

十一

明鈞州知州潘恩字子仁江南上海人登嘉靖二年進士授祁州知州調繁鈞州鈞徽王藩府也宗戚豪悍恩約束之州人爲建祠配公孫僑黃霸居官崇尚儉素政令清肅興學校杜請託省浮費轉南京刑部員外郎士民奉入遺愛祠祀之嘉靖時巡撫河南徽王載堉貪虐與按臣共劾之王遂奪封伊王典樸驕橫恩一切裁之河南素苦藩府自恩連制兩悍王民甚賴焉 明据

史周延傳
附載補

明大梁道李乘雲字騰洲直隸高陽人以舉人授浮山縣知縣流寇攻城乘雲發一矢斃其魁衆遂遁累遷山西僉事崇禎十四年以才調河南大梁道駐禹州冬十二月李自成寇禹乘雲赴

官甫二十四日按籍軍伍半虛守禦無具知州某請降乘雲叱曰此吾死所也乃以大義激州之士民爲死守計已獨當城南半壁發矢礮殺賊甚衆城破猶巷戰手刃數十人力屈被執初賊自鄢陵陳留來守令皆望風降獨禹人死戰最後下賊入令屠城乘雲呼曰城守吾責也吾令守城無敢不守猶汝令攻城無敢不攻何與於民吾以一身當之耳賊意沮乃收前令而欲降乘雲乘雲奮罵不屈遂縛諸樹聚射之死猶寸磔焉事聞贈光祿卿乘雲至禹時徽王支屬之在禹者凡十七家公議集土人訓練而宗藩輸其餉知州某持之宗藩亦無應者及城陷十七家皆及於難知州某泥首乞憐於賊乘雲忽奮起以足蹴其

禹州志

卷之十七

列傳一

十三

面曰汝負國勦民尙思向狗彘求活耶賊赫掠三日始去民收骸骨葬之旣而其甥冀某扶櫬歸葬高陽民設祖帳致祭哭送十餘里不絕其後四十餘年州人請於上吏建祠歲時致祀私諡忠烈以張千總周吏目及當時守城同死者州人候選州同知余全生遙授訓導趙日躋太學生侯九韶庠生周鳴岐李儀化田種玉陳懋能七人同祀乘雲磔於城外西南隅大路旁槐樹下後人過之猶歔歔流涕云

參用舊志明史忠義傳方望溪文集

按明史忠義傳及舊志僅載李公死節大畧惟方望溪文集中有公死事狀一篇其事則徵諸孫夏峯之孫用禎官禹州學正者訪於州人信而可據故其文甚詳密今採之以作此

傳槐樹舊在南關外之大路西先是從難七姓之裔值公諱日必祭公及其先人於樹下迨後樹彫落始祭於忠義祠中趙日蹟之裔金簡今已八十餘自言其童時猶與祭及見比樹是樹之朽幾七十年矣煒敬當補植槐而立碑其下并勒望溪文於陰以表忠良死義之所又按張千總周吏目傳者失其名檢舊志秩官志明季有千戶張漢鼎吏目周天祐疑卽其人特未敢以臆斷故仍闕之

國朝禹州知州馬汗朱字天衢直隸永寧縣人由舉人陞任知州時禹城已爲武剛所屠無一人跡汗朱單騎之任卽故郡王邸居之自操井臼以供飲食招集舊役僅得七人身率斬關

禹州志

卷之十七

列傳一

十四

草萊掩道路白骨明大梁道李乘雲樞爲剛黨所毀以禮殯之營頭翟四盈李竒生張周仍據寨殺人申請於上縛送梟示盡斃餘黨邵鳳祥宋九隆等於杖下宋希隆獻媚僞官殺

舊州判立寅之死境內肅然

舊志

大梁道沈荃字位菴一字繹堂江南華亭人順治九年進士第三人十三年由編修出爲按察司副使分巡大梁道駐劄禹州是時兵氛甫定學宮多毀荃出俸金脩建其前代帝王名賢廟貌陵墓有關禮教者罔不興復頻年河決柳束兼兵檄充斥苦累難支乃詳請撫按禹鄭十餘邑衝煩之地得減其三民困稍蘇公暇則延士子課菽文手評面誨之或與諸文士宴集

時通人如寶應陶澍季深華亭計南陽子山皆在幕府爲文字之交蒞禹凡七年康熙元年議裁各省員缺遂去官士民建祠頌之荃善書能文主修河南通志時以爲則詩文之留禹者邑人珍爲墨寶官京師時屢賦懷禹書貽邑中終詹事府詹事謚

文恪

參舊志

禹州知州邵大業字原菴天津人雍正十年進士授黃陂知縣以廉能特薦時知縣有行取例用主事注冊旋丁艱起復授禹州嘗一騎一役親問民間疾苦與田父野老隨地聚語多不知其官者回署則輿利除弊人咸歌之曰我公不游我何休至今以爲美談春秋省耕勸稼懲惰賞勤歡呼之聲達道路尤重讀

禹州志

卷之十七

列傳一

十五

書好修士每月設考課激勸獎厲創書院建柏山文峯塔州志久不脩治大業延邑名士王聿修余昭等爲之整理三教堂者經督學林公 偕巡撫顧公色疏請移奉夫子像於書院義學而改三教堂爲梵宮道觀文風里神垕鎮義學舊有聖像至是他口三教堂之聖像亦移奉焉有髡者有髻者有冠者服制各殊大業往拜恐後人又疑以爲三教堂因爲文以記立碑廟中大業由禹移睢州旋擢開封知府禹人思其德政爲之立碑仕至徐州府知府卒王聿修載其實蹟十二則云培植學校勸課農桑釐正祀典減省行稅纂修志書起建文峯開濬水道優給工食奠安河口體恤民力戢化強暴表彰節孝論者以爲信

宦績傳

漢潁川大守毋將隆字君房東海蘭陵人大司馬車騎將軍王
音奏請爲從事中郎遷諫大夫隆奏封事言宜徵定陶王使在
國邸以鎮萬方綏和元年上竟立定陶王爲太子隆遷冀州牧
潁川太守哀帝卽位以高第入爲京兆尹歷執金吾後以不附
王莽爲所免

漢書本傳

潁川太守嚴詡陵陽人以孝行爲官謂掾吏爲師友有過輒閉
閣自責終不大言郡中亂王莽遣使徵詡官屬數百人爲設祖
道詡據地哭掾吏曰明府吉徵不宜若此詡曰吾哀潁川士身
豈有憂哉我以柔弱徵必選剛猛代代到將有僵仆者故相弔

禹州志

卷之十七

列傳一

十六

耳詡至拜爲美俗使者

漢書何並傳

陽翟令田輝字叔都左馮翊人兄字威都叔都最爲知名郡常
欲爲察授之輝耻越賢兄懼不得免因緣他疾遂託病瘖家人
妻子莫知其情人數恐灼持之有度後在田舍天連陰雨友人
張子平吉仲考等密共穿窬奪取衣衾窮夜獨處迫切至矣然
無聲響徒暗暗而已子平因前抱持曰我某公也謂汝避兄何
意眞然耶天喪斯人吾儕將何效乎相對歔歔哀動左右間積
四歲威都果舉遷安定長史據輜垂綏還歷鄉里薦祀祖考叔
都 醜神坐頰仰因語是月司隸太尉大將軍同時並辟爲

御史舉茂才不幸早隕威都官至武都太守太尉掾

應劭風俗通

潁川太守葛興中風病不能聽政功曹舞陽韓稜陰代興視事出入二年令無違者興子嘗發教欲署吏秩拒執不從因令怨者章之事下按驗吏以稜掩蔽興病專典郡職遂致禁錮顯宗知其忠後詔特原之由是徵辟官至司空薨

後漢書韓稜傳

論曰興能任韓稜而子反之然不可以罪興也故錄之

潁川太守竇瓌扶風人大司空融之曾孫父勳死洛陽獄中瓌以章帝后弟官中常侍晉侍中奉車駙馬都尉以帝舅恩封夏陽侯光祿勳瓌少好經書節約自修出爲魏郡太守和帝時遷潁川後以兄憲獲罪免就國

後漢書竇融傳

潁川太守周榮字平孫廬江舒人肅宗時舉明經辟司徒袁安

禹州志

卷之十七

列傳一

十七

府安數與議論甚器之安舉奏竇氏皆榮所具草及竇氏敗榮由此顯名自鄆令擢爲尚書令出守潁川坐法當下獄和帝思榮忠節左遷共令後爲山陽太守所歷郡縣皆見稱紀以老病乞身卒於家

後漢書本傳

潁川太守黃昌字聖眞會稽餘姚人本出孤微居近學宮數見諸生修庠序之禮因好之遂就經學又曉習文法仕郡爲決曹刺史行部見昌甚奇之辟從事後拜宛令政尚嚴猛好發姦伏人有盜其車蓋者初無所言後乃密遣親客至門下賊曹家掩取得之悉收其家一時殺戮大姓戰懼皆稱神明由蜀郡河內太守遷潁川終大中大夫卒於官

後漢書酷吏傳

潁川太守王昱桓帝初蒞任時陽城杜密去官還家每謁守令多所陳託同郡劉勝亦自蜀郡告歸鄉里閉門掃軌無所干及昱謂密曰劉季林清高士公卿多舉之者密知昱激已對曰劉勝位爲大夫見禮上賓而知善不薦聞惡無言隱情惜已自同寒蟬此罪人也今志義力行之賢而密達之違道失節之士而密糾之使明府賞刑得中令聞休揚不亦萬分之一乎昱慚服待之彌厚

後漢書杜密傳

論曰密答昱之言范史書之以爲美譚然仲尼曰邦有道危言危行邦無道危行言遜密處昏濁之朝而以揚激自任所謂行過乎中者與是故張竦之答陳遵則言長短自裁馬援之戒兄子則云願效伯高夫固各有取爾也

禹州志

卷之十七

列傳一

十八

潁川太守楊彪字文先華陰人太尉震孫也熹平中以博習舊聞徵拜議郎遷潁川太守

後漢書本傳

北魏南潁川太守韋崇杜陵人高祖時除拜不好發摘細事嘗云何用小察以傷大道吏民感之郡中大治高祖聞而嘉賞賜

帛二百匹

北史本傳

北齊陽翟郡守李蒨之字曼谷樂道好文學天保初歷太子洗馬行陽翟郡守爲政清靜吏人稱之遷尚書考功郎中

北史本傳

唐陽翟令皇甫曾字孝常潤州人天寶中與兄冉登進士第歷侍御史坐貶舒州司馬陽翟令兄弟齊名人比之張景陽孟陽

云 全唐詩話

唐陽翟尉張薦字孝舉少精史傳太歷中浙西觀察使李涵表薦其才可掌史任詔充史館修撰兼陽翟尉累遷工部侍郎

唐書

本傳

金知鈞州事耶律公失其名秦州金山人大定二十一年知州事興法補敝百廢具舉不踰年民足盜息保德軍取新鄭民王永和輩補戎伍公請於府免之值歲大旱禱雨屢應郡民稱爲

刺史雨

舊志

元判鈞州事徐允恭字克讓毫之城父人由行人陞判州事送秋稅謁上府陳民輸運勞苦竟聽折鈔飛蝗集新鄭界率吏民

禹州志

卷之十七

列傳一

十九

往祭蝗一夕去夏亢旱次年春又旱皆捐俸市牲率民祈禱獲甘霖之應大府命覈實管城逃民悉獲其實考滿去民思不忘

舊志

明鈞州同知呂鐸登州招遠人洪武二十八年由監生任有能聲以求賢薦陞陝西綏德州知州

舊志

明鈞州知州徐明善湖廣邵陽人由儒士辟薦本州訓導秩滿以少保楊溥薦正統八年知鈞州爲政尙寬郡先多蝗告神蝗輒滅後蝗不入其境教民樹畜刊詩文勸民使知孝弟忠信禮義廉恥之道郡當養馬以山隘無草場具奏得免旱澇祈禱有應凡疑獄必求其情而生之學宮門舊在東廡後遷於學之坤維南向焉城池廨宇驛郵橋梁壇墀悉新之遇祭恭自省理務

盡豐潔善吟咏勤勸課後人古籍於禹孫永官至山東右叅議
舊志

禹州判官白瑜字楚瑛江南武進人永樂間由進士任廉勤有
幹與民興利除害凡力役財賦無不會計公平然後行之被薦
將去耆民張汝霖等詣闕乞復留職後入名宦祠
舊志

鈞州學正汪正字端甫湖廣麻城人宏治三年由舉人任嚴定
教規畫令諸生升堂習禮夜宿號房講誦不輟時尙書馬文升
丁艱宅臨學宮每五夜聞升堂鼓必加歎賞以禮記授多士一
時中鄉會試者六七十人丁憂去文升在吏部留闕復補行取御
史陞河南僉事陝西叅議
舊志

禹州志

卷之十七

列傳一

二十

鈞州知州董傑江南涇縣人宏治七年由進士任居官多惠政
學宮卑隘修廓增飭規制稱壯麗云
舊志

鈞州訓導萬廷彩江西武甯人宏治中由舉人任每教人必曰
立心勿苟且然後可以言造詣士有束脩餽送分毫不取其清
節自勵如此
舊志

鈞州訓導陳餘馨字德芳福建莆田人正德初由舉人任待士
恩義兼盡時州學乏治書經者餘馨至始出授講義一帙剖晰
不分晝夜士多成就進取科目至今庠序治書經者多皆餘馨
所遺也
舊志

鈞州知州李邦彥直隸薊州人正德三年由例貢陞任先皆士

城邦彥至始奉文包砌經理凡二年勤勞備至工甫畢流

風子率眾攻圍邦彥乘城出謀令男子守城婦人供飲食官

武弁及丁壯皆備策應晝放砲石擊賊夜遣壯士入賊營焚其輜

重賊縱火燒西門邦彥發令灌水滅火補葺城門一夜而完賊

見大懼凡格鬪八日而賊遁斬首八十餘級總治撫按紀功奏

聞進二階擢河東運同民爲立去思碑

舊志

鈞州學正方正梁字兆之福建莆田縣人正德十四年由舉人

任清約恬淡文詞皆自涵養中出其教人必本於正已議論必

宗乎性理士賴陶鎔得聖賢立教之遺意

舊志

鈞州同知李冕字宗周山東章邱人由進士嘉靖十二年以都

禹州志

卷之十七

列傳一

二十一

察院經歷左遷在州四年經濟有方佐泰和劉魁爲政掌課儒

林書院士子多賴其成就陞任後傳其學掇科者甚衆

舊志

鈞州知州陳吉字子元山西長治人嘉靖二十三年由進士任

初下車清理田賦革詭寄抑豪右附勢者多憚之時

吉執抗不屈爲所誣奏流海南衛坐連撫按俱廷杖海內以爲

冤

舊志

鈞州判官田大有字豫甫山東東平縣人進士嘉靖十九年以

御史謫任痛刷吏弊存心愛民每校士閱交不拘時格至所成

就竟如其見有知人之明焉

舊志

鈞州判官邱隅江南潁上縣人嘉靖中由監生舊志秩官志作

歲貢蓋明時歲貢亦入國子監也任外樸內明事體 達有告

訐隱私者被逮三命他官訊不獲直隅審之得情焉 舊志

鈞州同知方瑜字元臣江南歙縣人由進士嘉靖三十年以主

事謫任清謹審密癯然若不勝衣而剛方能斷吏民知其嚴毅

事不敢欺 舊志

鈞州訓導趙孟字晉臣山東掖縣人嘉靖三十年由歲貢任蒞

教必正色率禮日約多士習舉業研精義則以何王金許爲主

撰時文則以唐許薛瞿爲宗兩應河南鄉試二子煥燿俱早登

甲科爲名公卿壽百年始卒稱人瑞云 舊志

鈞州知州吳一介字元石江南桐城人嘉靖四十一年由進士

禹州志

卷之十七 列傳一

二十一

任蒞郡毫無所取蔬食布衣以樸儉教百姓革冗費省里甲前

此民逋賦至是公私俱足朔望至明倫堂講解書旨士子問難

應答如響在郡二年民愛之如父母陞工部員外郎 舊志

鈞州同知邊維垣字師甫四川彭縣人由進士嘉靖四十一年

以戶部郎中謫任溫雅明粹尤長於詩待士有禮佐政之暇惟

讀書長吟與前輩謫宦者媲美焉 舊志

鈞州知州施堯臣字欽甫江南青陽人嘉靖四十四年由進士

以吏部郎中謫任於鈞在郡二年苞苴不行清田糧革詭寄其

子千里來省越宿卽遣歸陞江西按察司僉事 舊志

鈞州知州唐汝迪字吉甫江南宣城人由進士隆慶二年以吏

部郎中謫任端愨明信蒞民不專威嚴有誣妻殺夫者汝迪廉
得其實爲平反百姓歌之

舊志

禹州知州張之屏字憲夫山西沁水人萬歷二年由進士任甫
至卽驅積役四十餘人公庭振肅比歲餘流民歸業者二百餘
家身先範物士類則之以卓異陞禮部員外郎民爲立碑

舊志

禹州判官楊允中字祖堯順天遵化縣人庶吉士萬歷三年由
御史左遷蒞官嚴明公餘與諸生講業課文多所開發州舊無
成志前守謹遺創草渙散不一允中芟其繁蕪閱三月規制大
定

舊志

分巡大梁張應福字子承直隸魏縣人萬歷四年由進士以僉

禹州志

卷之十七

列傳一

二十二

事任振肅有方提封乂安重修新鄭子產廟歸德六王廟朱僊
鎮岳武穆廟禹州馬端肅公祠李崆峒墓以州志闕檄州守趙
三聘集學彥著爲十卷禹自是始有志焉

舊志

禹州知州趙三聘山西河津人萬歷七年由進士任天資明敏
遇事卽解人稱神君爲政不尙近功然應急每善出奇郊行見
魏生十月無襦心憐之適有富翁鮮衣怒馬不避騶道貰其罪
罪使爲製衣翁生皆悅督學六月臨禹科試繩士嚴刻士中暑
掖出甚衆三聘陰庇之多所保全邑文士張鼎文好關公事憚
其嚴明不敢入竿牘隣邑初行條編法禹人援請於上三聘持
不可乃求顯者囑之三聘曰此後糧外之糧差外之差害倍於

昔矣已而果然乃服其先見禹志僅草創禮延邑人副使徐衍
祚舉人李嘉祿等纂輯半載始有成書至今賴之歷五年陞戶
部員外郎仕終憲副子體衡成進士官春坊諭德

舊志

禹州判官李開春遼東人選貢生萬歷二十年以孟縣知縣左
遷廉介有爲裁抑宗藩扶持良弱人不敢以佐倖目之時值歲
荒流亡載道州堂止一官獨掌州務晝則煮粥濟饑兼理政事
夜則巡城查街僻巷無不周到盜不敢發勞績稱最以直慙不
合於時量移寧夏衛幕人皆稱屈

舊志

禹州知州史邦載江南江陰人萬歷二十二年由進士以工部
郎中謫任抑豪右毀淫祠卽潁亭舊趾創立書院政聲懋著以

禹州志

卷之十七

列傳一

二十四

疾暴卒

舊志

禹州同知閔世南浙江烏程人監生萬歷二十七年陞任以名
家子博學有識居官無玷上吏嘉之委署本州及長葛縣事兩
地俱有惠政陞汝寧府通判

舊志

分巡大梁道朱思明字葆素雲南籍丹徒人萬歷二十九年由
進士以副使任政事之暇集諸生課執面爲品題陞河道叅政
禹民爲河夫者特加優恤懼疫全活甚衆民思之爲立祠焉

舊志

禹州知州馬協字寅所陝西同州人萬歷二十九年由舉人陞
任先是山荒爲累民逋賦申請除豁若干石賦乃報完徵收一
無所染罰緩盡充公費學宮壇墀衙宇城隍禹湯王廟皆重新

之公署各置器皿充斥其中皆用民爲之無一怨者簡僦土作
養如顧堯臣謝懋賞等皆中式飲食衣冠未嘗華侈公用則悉
從厚豐儉稱得中焉考三年滿陞鳳陽同知民爲立碑舊志

禹州知州王堯民字太樸陝西漢羌衛官籍灤州人萬歷三十
七年由進士任時尚寬厚玩愒成風宗室交橫民不聊生堯民
性廉直察吏之作姦者立寘重法民之逋賦半係收者乾沒嚴
以比之侵欺不得行鋤強扶弱小民始有生氣以疆項忤當道
意爲里豪所誣論劾鄉民李登仕等詣闕訟寃吏部尙書孫丕
揚爲之嘆息覆疏有衆服剛明之語仕終湖廣副使舊志

禹州知州陳騰鳳字鳴周福建莆田人萬歷三十九年由進士

禹州志

卷之十七

列傳一

二十五

任和粹冲夷待士以禮騰鳳以尙書中式進士禹士治尙書者
咸請業焉爲刊燕中講錄適適近草士傳其書中式者顧堯臣
劉調羹皆出本房後督學中州待禹士有加焉舊志

分巡大梁道呂兆熊直隸柏鄉人萬歷四十一年由進士以僉
事任時宗室橫肆侵害士民兆熊取其撥置者痛繩之禹乃得
安居二年福王之國河南官校藐法橫於洛中移往彈壓洛賴

以寧仕終戶部尙書

舊志

禹州知州袁昭文湖廣蒲圻人萬歷四十一年由舉人陞任簡
默廉謹堅執法請託不行謂爲鐵耳宗室載堦與郡中豪歃血
結盟生某附之前守王堯民旣被篡誣里人畏之如虎因奪劉

生產不遂縛辱通衢諸生捲堂興訟詞連某生生求要人囑當道縱生逃又將釋載堺惡僕昭文招惡僕戍配生狀斥革人咸快之修城修學不勞民而事集以忤當塗旨論調去之日惟圖書衣服兩擔而已

舊志

禹州同知王業純山西長治人萬歷四十一年由選貢任兩署州事民皆安之居三載陞山東濟南府通判

舊志

禹州知州馬鳴穀四川內江人萬歷四十四年由舉人任居官半載始置一布袍罰穀有告免者曰守非愛錢積穀歲有定額耳猶量減之其子以乙榜授興濟教諭使人求路費予銀五兩或病其少曰我無餘財也任滿陞彰德府同知

舊志

禹州志

卷之十七

列傳一

二十六

分巡大梁道金煉山東德州人由進士以天啟元年官按察使任二年晉右布政兼副使仍管道事沈默寡言執法不移諸豪交通兩河持吏長短爲里民害煉廉得其狀密聞巡按盡捕驗治士民快之稱爲擣巢

舊志

禹州學正劉允繩浙江秀水人天啟元年由舉人任下車試士取董學益爲首命諸生各立社凡二十餘處閱文詳加品評士皆向學董以是科發解陳篤睦魁本房李從繩晚達中式邢長文亦備中皆會中士人稱異焉

舊志

分巡大梁道葉大受浙江餘姚人由進士以崇禎三年官副使任疾惡如讐言不妄發凡衙蠹土豪廉實卽捕逮立獄謫戍站

配悉當其罪人擬之趙廣漢何並云

舊志

分巡大梁道王源昌字紹貽湖廣黃岡人由進士以崇禎十三年官叅議兼僉事任時宗室怙寵驕恣夜劫盜人源昌蒞任嚴治之民得安寢是歲自春抵夏不雨人相食大盜蜂起源昌日坐城頭設法防禦煮粥招撫請兵捕勦一郡賴以保全以終養去民慟哭焚香送之

舊志

署禹州知州蕭時望遼東人由歲貢明末以原武訓導署事尋實授土賊武剛攻陷禹城時望赴河北請示驅之禹民乏食力請撫按得僞官積米在密者先十餘石賑濟之仍捐貲分貸諸生時剛殺士民將盡非時望請驅逐禹人幾無噍類

舊志

既云殺士

禹州志

卷之十七

列傳一

二十七

民將盡何以能請示驅之 舊志語不明今姑仍之

朝大梁分巡道張自昌字存儒浙江山陰人由特用順治四年以副使任時丁大亂餘一意安輯民始帖定諸如修學宮禮士紳瞻窮獨止驛騷省輓輸善政甚夥自昌始至城內蒿蓬滿目比浹歲農聚商集民有起色司府檄取墾地實數州胥浮報過多感諸生言詣撫請之得檄實民建生祠奉之俸滿遷昌平參政離禹曰父老遮道送者數百人

舊志

禹州知州蔡永華字介磁山東蓬萊人順治二年由恩貢任下車卽奉增地之檄永華履畝丈量僅取足額不事苛求民皆便之凡加差徭苦心調停務期節省考滿陞福州府同知聞報猶

延邑人士纂輯郡志成帙文獻賴以不絕

舊志

禹州知州朱裴字功卜山西聞喜人順治七年進士任州事任滿擢刑部員外郎尋改御史終戶部侍郎

舊志

分巡大梁道佟國鼎字君持遼陽人恩貢生先巡撫福建峭直忤當道順治八年左遷國鼎豪爽英邁疾惡綏良嚴繩衙役優禮儒士與人藹如也土寇張陽雖就擒而未決國鼎鞫審擬大辟尋磔尸於市民賴以寧每兵馬經過必諭引導由荒僻不使近郊後引疾告歸

舊志

禹州知州孟希舜字華宇遼東人恩貢生順治十六年陞任下車輒誓不取民一錢鄰郡雜徭旁科踵弊繁興希舜痛革絕驛

禹州志

卷之十七

列傳一

二十八

遞一事歲省民財千金兵騎旁午應之裕如陞浙江温州知府行之日民遮道垂泣如失慈父

舊志

禹州知州史廷桂字書巖浙江蕭山人拔貢生初授肥城有惠政順治十八年陞任焉廷桂聰慧明敏博涉羣書工文詞禹當大創後巒宮焚燼下車卽周視經營捐貲鼎建時延俊秀課藝文行丕振祀典有禹湯二廟咸重新之名賢遺跡罔不修整禹最患河夫廷桂力申請巡按奉准兵衝得減其三民皆感之

舊志

禹州學正吉祥字辰生商邱舉人康熙四年任初至禹覩學宮茂草遂謀於知州史廷桂重修啟聖名宦鄉賢三祠仰高遺愛就圯又移於留侯洞以祀之明兵巡道李乘雲徇節南門外立

石表其事訓士子砥礪名節肆力文章一時士論宗之

舊志

禹州知州高良弼字帝賚山西垣曲人拔貢生初授豐潤知縣性儉素康熙八年至官禹九載寒暑一革靴未嘗易也簿書暇時單騎隴畝勸課農桑一時墾闢爲多致仕歸

舊志

禹州知州羅之熊字子濱鑲藍旗廕監生康熙五十年任性剛直遇事能斷甫下車除巨盜高月士民咸服城南地卑下每雨多禾輒淹浸之熊鑿渠洩水遂除患禹自明季遭闖寇城大壞雖經補葺未獲完固之熊慨然以重修爲任延邑士督工不數月而告竣門樓女堞至今魏煥焉

舊志

禹州知州李朝柱字東崖山西臨汾人監生康熙五十四年至

禹州志

卷之十七

列傳一

二十九

禹才能敏捷遇事迎刃解能詩善草書以作育人材爲心修丹山東峯兩書院各置學田備養贍每月課季考衡文較射竟日忘返時中州瓜賊甚熾朝柱緝獲渠魁真之重典上吏委督運浦灘河勤於王事不憚勞瘁著有於役草禹人爲繪出塞圖紀

其事

舊志

禹州學正孫用正字以寧輝縣舉人夏峯徵君鐘元之曾孫也康熙五十五年任學事詩文詞賦名噪於時尤工書法人謂其得鍾顏筆意官禹數載教士科條一出徵君家塾凡名節風化所關表揚不遺餘力又佐知州屠用謙修理文廟皆身經營之以終養歸邑士各贈詩爲立去思碑誌不忘云

舊志

禹州知州孫國璽字鎮九正白旗人進士知鄢陵縣雍正四年擢任禹州未下車豪猾爲之斂迹及履任嚴汰冗役考校六房書吏止留辦事數人衙蠹相戒不敢爲奸禹人有以窩賭爲事者聞國璽至皆改業爲良民尋陞開封府知府士民至今言之猶凜凜云

舊志

禹州學正孫鑄字 中牟舉人以登會試明通榜雍正五年來任清勤奉職無以束脩干者立社學捐俸買經書銳意作人文風丕振卯辰諸科登乙榜者六七人明倫堂就圯謀於州守募貲督理竝東西齋及大儀二門悉重修之生童中有貧寒不能自給者出學田粟爲之周卹人皆德之任禹十六年調睢州陞

禹州志

卷之十七

列傳一

三十

汝寧府教授致仕

舊志

禹州知州壽致蒲字南雲浙江諸暨人進士雍正九年來官質直端亮涵養純粹寡言笑黜苞苴廉靜自持終日端坐後堂吏以事稟高聲傳宣不令與司門人交語民有訟者差役勾攝量道路遠近給以盤費役無敢擾聽斷必得其情無留獄每躬履田間勸課農桑訪民疾苦後坐事註誤民至今思之

舊志

戴廷梅字羹若江蘇長洲人由監生迨入明史館議叙歷任至禹州甫下車銳意興舉時前牧邵大業所纂州志未刻廷梅力刊成之金川軍興他邑率用一斂十苦累民間廷梅加意體恤以邑人士端方老練者董之家人吏胥絲毫不干涉故禹人雖

亦供役而里下帖然安堵事竣廷梅自清化返禹禹民製 民
衣繖張樂設飲以迎之其後

高宗巡幸中嶽延梅奉檄辦差密邑優恤貧民觝觸禁旅事績尤鉅
上聞之大悅特賜貂緞擢直隸汝州知州遠近以爲數郡清官第一事

詳州人王聿脩所作傳 採王聿脩擬稿待志名宦傳

禹州志

卷之十七

列傳一

三十一

